

興京縣志第十二卷 人物

目次

帝王

功勳

循良

名宦

鄉宦

鄉型

鄉老

孝友

興京縣志

卷十二 目次

節烈

文學

仕隱

逸民

流寓

氏族

方外

慈善

義舉

天子當陽諸侯用命從龍有佐知國運之方隆以烏紀官溯聖朝之
啓瑞當夫垂紳紫極翊贊綸扉珥筆丹墀書名簡策賢才輩出參東
閣之賓僚屏蔽攸資作北門之鎖鑰入則周公召公出則方叔召虎
其繫於生民之望者深矣至若銅章墨綬績著循良保障繭絲政稱
卓異亦莫不歷歷可考也興京自國初以來元首明良股肱濟美宗
藩並作麟角致詠夫振振帝胄迭興鴻名久欽夫赫赫功垂竹帛名
勒鼎彝所謂邦家之光不僅閭里之榮也然而天潢遺澤彪炳人寰
豐鎬殊恩永留桑梓河山帶礪鞏固萬年矣志人物

帝王

清太祖顯祖之長子名努爾哈赤宣皇后所生龍顏鳳目偉軀大耳
天表玉立聲若洪鐘英勇蓋世騎射軼倫國人稱爲聰睿貝勒迨景
顯二祖被害明曾給馬匹勅書龍虎將軍印綬不受其賄誓必復仇
先收服諸部落明萬歷四十四年丙辰上尊號於赫圖阿拉城爲天
命元年天命四年勝明兵於薩爾濟六年遷都遼陽十年遷都瀋陽
十一年八月庚戌龍馭上賓享壽七十年葬福陵

清太宗太祖之第八子名曰皇太極封貝勒國人稱曰四貝勒孝慈
皇后所生天表奇偉面如赤日善騎射料敵制勝用兵如神嗜典籍
披覽無倦明天啓七年爲天聰元年時年三十有八力圖進取熊廷

弼袁崇煥等相繼與敵未能挫其氣天聰十年四月羣臣以功德隆
盛上尊號曰寬溫仁聖皇帝改元崇德國大清時明崇禎九年太宗
四十八歲勤修政治進取之心益堅由喜峰居庸各口屢進入襲如
入無人之地然以山海爲之控扼聲勢不接取易守難未得直抵燕
京崇德八年駕崩諡曰文皇葬昭陵世宗嗣位改元順治是年入關
功勳

代善太祖次子征諸部落戰功甚多封貝勒國人稱大貝勒天聰九
年封和碩禮親王

阿敏太祖姪助太宗破明兵於吉林崖天命元年封貝勒
多爾袞太祖第十四子天聰九年叙功封睿親王智謀過人太宗崩

攝政扶世祖入燕京正位

多鐸太祖十五子天聰叙功封和碩豫親王

豪格太宗長子天聰九年叙功封和碩肅親王

岳託大貝勒代善長子天聰九年叙功封和碩成親王

費英東佐太祖經營興京立功甚多爲一等大臣世襲信勇公

何和禮爲太祖經營興京時五大臣之一太祖以長女妻之世襲勇
勒公額爾德尼與噶蓋二人清太祖居興之己亥年二月奉命以蒙
古合滿洲之語音聯絡成句因文見義是爲滿文頒行國中滿文自
此昉始

循良

從來親民之官曰牧守曰縣令有人民社稷之責也其遵守成法而有良善之治績者則爲循吏太史公有循吏列傳元成遵奉使察守令賢否得循良者九人此循良之所由名也興京自設治以來歷任長官政治教化車著循聲舉興利除弊諸大端百餘年中昭然可考所謂賢而有德才而有能者也茲特彙編以志去思焉

循良

劉景醇字伯黼江蘇人同治三年以舉人授興京通判時值境內賭博風熾無賴之徒結黨滋事胥吏擾民尤無忌憚公下車後力剔舊弊民呼青天明年盜酋周泳率象陷城公守死不去遇難署中邑人請立專祠於通判署中春秋予祀厥後燬於俄燹民國十年移祀縣街關岳廟東院祠中

許之泰字子山光緒三年授興京同知到任後適由老城移署新賓堡創修文廟建啓運書院優禮待士自此民間知令子弟讀書公精書法墨蹟尙有存者

徐慶璋字璵齋浙江人由寬甸知縣升任同知光緒十七年來興仁

明廉果喜微行市中小事則爲剖其曲直而遣之遇貧乏孤獨之人必賙恤之倡修養濟院收養貧民寄歸收容旅櫬明年春以事出南鄉歸途見農事尙未見盡舉抵署召各村鄉長詳切語以農事不可違時之義至今鄉中猶留早種一天早收十天之諺卽承公之訓也去任後邑民爲樹碑於撥補路側文曰愛民如子

孫長青字紹卿光緒二十八年由海龍府調任來興是年秋八月境內降雪年事歉收民苦乏食而鄰封復禁糧出境公力請督撫飭解糧禁以蘇民困又復籌貸措賑以圖補救先年海龍有秋民感公德爲言孫公蒞興不幸丁年荒不忍斯民飢死輸糧往濟車馬屬道而民以獲以生三十一年日俄構兵興邑當其衝公力守中

立周旋其間無所病民是秋倡辦學校警察諸新政明年夏去任萬民遮道不欲其行

馬俊顯字績卿吉林人光緒三十三年五月到任折減地餉以舒民艱創立鄉學百二十餘處改變科房班役興利除弊張元奇民政使巡視東邊嘉其賢能

都林布字雲卿京兆人宣統元年八月蒞興勤聽斷除奢華時值啓運學校欸項奇絀公捐廉千兩以助是年冬以赴都引見去任

張鳳臺字鳴岐河南安陽人光緒乙未進士宣統二年五月到任以儒術飾吏治籌警學各欸以謀久遠協同屬縣創府立中學校遇事開誠布公人共欽仰民國二年春升河南省長去任

鄒健鵬字子方四川富順人民國三年四月攝篆來興人甚精健整頓地方不遺餘力每到學校必詳問學生注意經書親教學書法遇警身率士卒禦防不避風雨暑寒兩季考驗醫生以重民命周濟貧民不惜貲財七年秋收撫衆匪賴公救輯邑免於禍八年春去任積累頗巨士民釀助數逾萬元夙昔感孚於此可見署前設有豐碑以紀德政

名宦

雲龍風虎爲盛世之名臣心膂股肱膺封疆之重任一時德被生民功施社稷勒之金石播之聲詩以耀後世而垂無窮固大有人在也興京自國初以來分茅胙土累世勳舊之臣所在多有迨至聖聖相傳人材蔚起搢紳之族不乏象賢世祿之家亦多吉士經文緯武聲施爛然名著當時光增史冊今雖人往風微其故家遺俗流風善政猶有存者懿歟盛哉茲將先達後進負天下之望者彙爲一編以徵貴顯

名宦

龍錫 姓愛辛覺羅氏鑲藍旗人世居腰站地方興祖直皇帝第三子索長阿之曾孫初官長史升至武英殿大學士以功晉輕車都尉世職

阿塔 一譯何地大學士龍錫之次子由總尉累官至山西太原巡撫

扎克丹 大學士龍錫之長孫承襲祖父效力所得輕車都尉在官未詳以恭逢覃恩誥封資政大夫蓋正二品之官

巴哈布 太原巡撫阿塔之次侄積官至山西按察使司
明亮 按察使司巴哈布之長子官至內閣中書

興京縣志 卷十二 人物

六

明舒 一譯明壽按察使司巴哈布之次子官至直隸河道
阿爾松阿 扎克丹之第七子不詳所官以恭逢覃恩誥封資政大夫大率不出正二品

圖思德 扎克丹之長孫阿爾松阿之長子累官之至巡撫雲貴總督以功贈雲騎尉世職

圖思義 阿爾松阿之次子歷官內閣學士監察御史

恒慶 雲貴總督圖思德之長子原任盛京戶部員外郎

集蘭 原任進士仕至光祿寺署承及主事 中書明亮次子

安平 姓扈錫哈里氏滿洲正紅旗人善書法累官至河南道

玉肅 原名裕誠字警堂姓扈錫哈里氏滿洲正紅旗人襲祖效

力所得騎都尉兼一恩騎尉歷官盛京內倉監督大圍場
總管牧巡司行走滿洲鑲紅旗協領丈放鴉龍崗荒地總
辦奉天機器局總辦裕字軍統領

古桑阿

姓富察氏滿洲旗人原任盛京陵寢總管以恭逢覃恩誥

封資政大夫

見八旗滿洲氏族同譜

薩爾海

古桑阿之裔仕至盛京戶部郎中

見富察氏宗譜

羅永慶

字善庭前以候補知縣充山東黃河工防汛監視陝西督
糧倉總辦光緒三十四年旋里嗣當選爲府參事會參事
員民國元年冬被選爲衆議員二年解散國會乃返省營
實業三次革命先期赴滬與兩院同人組織國會議員團

五年國會恢復六年又經解散之厄遂至廣東入非常國
會乃於羊城召開憲法會議卒以軍政交鬪事敗垂成爲
擁護憲法往返嶺表江南之間六載之久十一年國會還
京仍爲衆議院議員以護法功高受大總統特授二等大
綬嘉禾章二等文虎章十三年冬擢任吉林依蘭道道尹
丁 超
字潔忱世居縣西鄭家堡少年讀書遊泮清光宣間留學
日本士官學校第八期步兵科宣統三年五月畢業歸國
歷充陸軍第二混成協第四標教練官東三省軍械局科
員陸軍軍官學校提調奉天軍械廠科長吉林都督府副
官長民國三年七月補授陸軍步兵上校十月調充奉天

軍械廠科長四年兼辦錦縣分廠事宜五年升任廠長七年兼充奉天總司令部兵站處長八年充北京步軍統領衙門總參議兼軍械庫總辦六月充東三省剿匪南路總司令部部參謀處長八月充黑龍江督軍署參謀長兼國防籌辦處長九年二月因呼倫貝爾取消自治案晉三等文虎章先是蒙古宣布獨立已久至是奉令馳赴呼倫貝爾招集首領貴副都統及所屬各廳長王公等曉以利害立令取消自治恢復原狀三月兼充黑龍江滿海警備總司令東省鐵路護路軍哈滿司令旋奉策令升補陸軍少將並獎給三等嘉禾章是年秋在滿洲里首先解除俄軍武

裝官兵押解出境十年調吉林督軍公署參謀長兼東省鐵路護路軍總司令部顧問五月大總統給予四等寶光嘉禾章六月晉級二等文虎章十一年充奉天督軍署軍事顧問四月爲鎮威軍後方司令兼總司令部參議六月充延吉鎮守使兼吉林第二混成旅旅長延瑋和汪戒嚴總司令是年秋在琿春解除白俄臨時總統狄帖里赫氏全部武裝收容其官兵得獲槍礮馬匹子彈甚夥十三年調充吉長鎮守使兼陸軍第八旅旅長並第一第十第二十六三旅訓練事宜是年秋奉直戰起令率本旅由綏中出邊至熱屬凌源白土領子遇敵一戰佔領王大漢子嶺敵

旋大至血戰七晝夜敵敗我追連奪乾溝鎮界嶺口臺頭
營諸要害垂勝克復撫寧昌黎諸名城敵軍腹背受脅山
海關正面始退留昌數月掃清敵氛酌賑民困十四年郭
軍倒戈長春爲三省要樞險象環生謹依戒嚴司令職權
處以鎮靜度過難關十五年調充濱江鎮守使兼第十八
旅旅長護路軍長綏司令十六年奉令補授陸軍中將十
月晉級大綬嘉禾章十七年夏匪首趙祥嘯聚股匪劫掠
票車親率官兵追剿三越月大小十餘戰匪首就擒遂平
十八年中俄事起奉令爲吉林前敵總指揮十九年一月
國府元旦授勳蒙獎給三等寶鼎勳章大同元年間解職
歸田蜷伏不仕靜沐 皇恩矣

金名世

字武宣世居縣二區旺清門歷任黑河鎮守使署三等軍
法正濱江鎮守使署參謀長兼三等軍法正吉林汪清縣
長吉林長官公署法律秘書哈爾濱電業局總辦吉林警
務廳長現任三江省省長

王慶璋

字宗禹世居縣二區旺清門日本東京高工畢業民國十
年任東省鐵路護路軍司令部外交科長十一年任東三
省兵工廠化驗廠技師十二年任東三省兵工廠廠長十
五年調任東三省兵工廠兵工學校教育長兼充藥廠技
師是年授三等文虎章及陸軍礮兵上校十六年調任兵

工廠鑄造廠技師兼藥廠技師代行鑄造廠廠長職務十七年兼任航空處講師又兼警務處技正及公安局秘書等職二十年事變後創立自衛警察局任科長兼秘書等職並辦理維持分會等事又任奉天省政府諮議大同元年任民政部理事官年俸一萬一千元又改充囑託月支手當七百元大同二年任民政部土木司長簡任二等三級康德二年辭去民政部土木司長五月二十四日任奉天市長

鄉宦

天地之正氣不鍾於物必鍾於人深山大澤實生龍蛇不遇錯節盤根不足以徵利器夫莫爲之前雖美而不彰莫爲之後雖盛而不傳士當草茅伏處之年抱道自重不輕干謁以投時而應運崛起者不甘流俗類多克自振拔見重於當時或以才名見知或以清白見賞以及轄一官領一職分道揚鑣咸能各展其抱負迨至解組歸田宦遊已倦且爲國人所矜式薰其德而善良者實繁有徒若夫韻士高人儀型千古村夫嫠婦特具一長亦莫不據事直書爲後人所取法邦家之光歟閭里之榮歟而使貪夫廉懦夫立是大有功於名教也

鄉宦

哲爾懇 官宗人府佐領姓愛辛覺羅氏

明壽 姓愛辛覺羅氏字青山原任筆帖式兼主事

德潤 姓扈錫哈里氏滿洲正紅旗人仕至益州倉官

蘇赫德 姓富察氏滿洲鑲紅旗人官至護軍校

富格 姓同前 原任驍騎校

托爾弼 姓同前 原任筆帖式

費揚古 姓同前 原任筆帖式

博思泰 姓同前 原任博士

圖拜 姓同前 原任司庫

興京縣志 卷十二 人物

明德 姓同前 原任筆帖式

明升 姓同前 原任筆帖式

博爾屯 姓同前 原任三等護衛 以上九人俱見氏族通譜及富察氏宗譜

多津 姓同前 原任筆帖式

海豐阿 姓同前 官盛京刑部庫使

恩慶 姓同前 官錦州鑲紅旗驍騎校調升岫巖防禦恭逢覃

恩勅贈武略騎尉

玉崑 字掄元姓旗同前曾任興京副都統衙門武巡捕官

錫倫 字九陽姓旗同前曾充興京營哨官

祥科 曾充陸軍連長及營副官團副官等職民六民七浦漢兩

役有功補授中校

啓光

字國華又字賓侯協領玉肅之子姓扈錫哈里氏滿洲正

勒舒

紅旗人奉天法專學校畢業曾充義州佐領清河門防禦
滿洲人康熙二十三年以驍騎校擢荊州佐領五十二年

升荊州協領

恒泰

字季安咸豐丁酉科拔貢朝考知縣分省四川任忠州除
暴安良政聲卓著轉任成都知府過道班加按察使銜工
書留蜀石刻甚多光緒初年辦理東邊稅務

德克精阿

興京正白旗人光緒年間曾任綏中縣中後所佐領

李聯祥

字芝庭光緒二十年以巡檢分省試用二十一年指陝西

侯補二十七年加同知銜二十八年充安邊廳同知二十

九年秋調任保安縣知事三十年署理延安知府宣統元

年署澄城縣知事宣統二年調署醴泉縣知事宣統三年

充全陝模範監獄典獄長適民軍起義遂携眷返籍

關玉肅

字景堂正紅旗人曾充清室內倉監督及圍場總管襲錦
州協領

袁澍滋

字霖普光緒壬寅年補庚子辛丑恩正併科舉人歷任河

北察哈爾灤州順德獨石口豐鎮任邱故城各府州縣頗

着循聲擅文詞有歷代中外男女孝弟言行錄傳於世原

興京人後移居桓仁縣

羅永貞 字利亨前以治河工荒礦諸務積績保侯補知縣民國四年充津浦路商貨總捐青縣局長調任天津貨捐局七年任山東城武縣公署科長八年任衆議院秘書十一年兼任憲法會秘書受大總統特授三等嘉禾章

李培元 本籍平定山人侯補吉林署農安縣知事

喬賡雲 字漢章本籍附生幼年受知於張頗老游書啓幕經歷保獎以直隸州知州叙用民國初年充奉天陸軍二十七師執法官旋充軍署參謀軍務處處長民國十年充航空處處長十二年冬充安東鴨綠江採木公司理事長

劉熙春 字積卿光緒癸卯科優貢保和殿朝考欽定二等第十四

名以教職用自弱冠授徒鄉里考啓運書院受知於徐公瓊齋林公幼瀛孫公芝齋游書啓幕十二年後充啓運高小學校校長及興京勸學所總董創辦學校百二十處興京府立中學校監督代理興京教授旋改充縣中學校長復充勸學所長任滿赴吉林馬實業廳長之召充秘書初先生以文藝刻石受知於馬公績卿師事焉光緒三十二年創修興京志見許於張小圃提學使三十四年重修府志宣統元年續訂府志是年秋受馬績卿聘修桓仁縣志其在吉林著有吉林實業叢刊於移民實邊言之尤詳通醫術充本縣醫學研究會名譽會長他如金石漢隸尤擅

其長畫羽翎花卉蒼老有神喜吟詠每適意脫口而出則
戛戛獨造性行傲岸於學業尤心領神會教人呐呐如不
出口而及門之士成就頗多日人岩杉佐太郎曾從先生
受業學庸唐詩師事維謹

金名世 字五宣由國立北京法政大學法科卒業歷任黑河延吉
吉長各鎮守使署軍法官濱江鎮守使署參謀長防俄東路前敵
總指揮部少將參議官汪清縣長吉林省長官公署機要秘書哈
爾濱電業局總辦吉林省駐哈特派員吉林省公署警務廳長吉
林全省保衛團管理處總辦現任三江省長

張耀東

字文山奉天農林專科畢業曾充本縣農會會長民國二十年值唐李變後當百事待理之秋公署之卷宗散失各鄉之戶口凋零大同元年奉檄爲興京縣長以本邑之名流縮桑梓之墨綬蒞任後一以廉潔自持其勤政愛民之事不勝枚舉而於救濟災黎一端尤爲不遺餘力康德元年夏季縣境山洪暴發急雨爲災秋收頓減至二年春四鄉糧食缺乏中戶之家室如懸磬雖朝廷賑貸頻施而民之嗷嗷待哺者流離載道縣長力謀補救奈杯水車薪緩不濟急乃召集農商士紳各團體會議成立施賑委員會設平糶法並隨時申請 省長撥發賑糧六千石以資挽

救又蒙

皇恩賜賑政府貸糧得以維持現狀民衆未至餓斃農商方慶更生敦意端陽節後霪雨連綿始則終日淋漓繼則大雨傾盆沿河居民險遭滅頂平原廬舍幾成澤國人物傷亡不可數計縣長體恤民艱轉請 上憲豁免被災各戶捐賦人民之全活者甚衆於至難之中求萬全之計非深於經濟關心民瘼者能如是乎爲國家行仁政爲人民謀幸福一時有口皆碑稱賢使君焉

劉如先

字汝言世居縣街河北前清實職巡檢曾充桓仁縣行政科長昌圖縣總務科長奉天全省官地清丈局評判員第一科科長監堅字繩委員並興京新民錦西等縣催欸委員直隸津海道尹秘書鳳城興京兩縣水利局局長兼興京林區駐在所所長大同元年充本署秘書清鄉局主任內務局長屈指充公多年清風兩袖宦囊如洗其爲人清廉高尚於此可見是以前在鳳城去任時商民感戴敬贈旗匾傘等項以伸謝悃民國八年在清丈局獎得八等嘉禾章十七年又晉獎六等嘉禾章康德二年頒給建國功勞章歷觀獎贈名實相符現在內務局長任內辦理新村制暨賑災義倉等事務期力除積弊實惠及民宜乎農商交頌慶我縣得良掾云

趙振球

字書田縣三區永陵鎮人奉天公立工業專門學校應用化學科畢業歷充本縣縣立小學校長暨私立日新中學校長教育局長等職現任本縣財務局長

史永泰

字魯瞻縣六區鄭家村人奉天省立第一師範畢業歷充本縣教育局教育委員並代理縣視學等職大同元年由情報處主任調升教育局長

蕭德潤 字玉泉北京法政專門畢業於民國二年應全國法官試名列第一爲京師地方所推事後轉任洮南地方所檢查長以清廉聞於上復轉任西豐縣長政聲卓著爲宦海之循良吏嗣任深縣縣長遐邇知名

徐箴 字士達日本高工畢業曾任奉天市政公所電車廠廠長省署主稿吉海鐵路工程司哈爾濱市電話局長現充北平市電話局長

孫象乾 字作新法政專門學校畢業曾任彰武汪清等縣縣長

楊耀鈞 字公衡曾任長綏司令部參謀長

王春鵬 買馬集村人曾歷任稅捐局長科長等職現任海龍縣公署內務局長

孫文藻 字采南日本東京工業大學機械科卒業歷任北寧奉山路局皇姑屯工廠工程司西北實業公司顧問機械技師製紙廠副廠長正太路局材料審查委員會主任委員

楊耀梁 字公權日本高工畢業歷任洮昂鐵路總局機務科長現任哈爾濱鐵路局機務科長

葉香芹 字葵南美國大學畢業現任北寧路局會計課長

白純義 字仲方世居縣街法政專門學校畢業歷任輝南等縣長現任河北省沙河縣長

萬文滙 字宗海日本東京高工畢業曾充吉林警務廳外事科長

現任綏濱縣長

王奎武

字雪樓係二區紅廟村人陸軍學校畢業曾任多倫縣長

劉雨霽

字雲程北京中國大學畢業現任北滿特區扎蘭屯行政

分處處長

馬大名

字志超法政專門學校畢業現任安東省公署警務廳保

安科長

姜永祿

北平朝陽大學畢業現任遼源縣地方法院推事

張樹勳

清溝子村人現充江省肇州縣大通鎮稅捐局主任

王成銓

八區木奇村人現充新京民政部土木司屬官

王書麟

字紱之城廂藍旗村人北平朝陽大學畢業現任遼源縣

地方法院檢察官

王育英

字一民五區杉松村人係東洋留學畢業歷任第十八團

副官民國二十年旋調天津市保安隊總隊長大同元年

升天津市公安局長年餘解職

楊耀棟

字明宇世居縣街現任吉林省德惠縣公署警務局長

金紹元

六區鄭家村人曾充黑龍江警務局長

丁澄庠

六區鄭家村人曾充吉林木蘭集斯各縣稅捐局長

吳冠英

六區鄭家村人曾充吉林缸窰穆稜各縣稅捐局長

鄒玉林

二區旺清村人現充哈爾濱電政管理局職員

馬平九

字禹鼎四區杉木廠村人現充江省望奎縣承審員

門連元 字仲良八區下夾河村人唐山交通大學土木工程學院畢業現供山東膠濟鐵路局工務處職員

申述堯 字賡唐一區茶棚村人曾充鴨綠江採木公司辦事員遼瀋道尹公署科員等職

王寶貴 字文樓世居縣街北京大學畢業曾充教育會會長

王捷臣 八區木奇村人曾充第三旅中尉副官又充四十五團一營六連連長又護理第二營營長

孫文芳 字澤南本縣二部師範畢業歷充縣中附小教員及教育巡行講員教育委員縣農會會長等職蒙前奉天教育廳長謝獎給一等褒狀經前縣知事黃記大功一次又任吉

林汪清縣政府科長

鄉型

鄒東郭有言問邑之貴則數高位以對問邑之富則數積財以對問邑之人物則數修德勵行濟世範俗者以對而富與貴不與焉十室之邑必有忠信陋巷之中不乏高賢一鄉有善士衆人取法焉古人言坊行表雖時移世易而令聞不朽宋徐積訓諸生日諸君欲爲君子而使鄉人賤之父母惡之如此不爲君子猶可也鄉人榮之父母欲之諸君何不爲君子士生今日欲求有所表見不隨庸衆芸芸以生泯泯以死宜何道之從焉

鄉型

劉殿甲 字輔亭 縣城人 書法有名於時 縣街匾額楹聯多其遺筆

李廷珍 字寶廷 東昌台人

孫忠顯 字占臣 平定山人

依會山 字 馬爾墩人

唐義鈞 字 罕羊人

以上五人曾於民國八年參與鄉老會議

孫殿元 字仲三 縣街河南人 曾充縣署吏科經書 爲人謹慎厚重

儉樸可風 治家有法 訓誨子姪 學成名立 服官多年 政聲卓著 屢

經上峯獎給匾額 以彰碩望 晚年家居 課孫誦讀 訓詁務求確切

考證無訛其處事精詳已可概見

蕭玉堂 字印泉縣街人業商多年爲人慷慨厚重好善樂施現任興京萬國道德分會副會長康德二年創設分會不惜巨資設置一切延聘講員實行按期講演務在挽回頹風鼓勵一般民衆皆有向善之心改革家庭舊習而尤注重女教以立向善之基礎純粹出於自然不加強迫於世道人心良多裨益求之晚近誠所罕覩將來教化發展民風樸厚蕭君與有力焉

孫桂滋 字馨山縣街河北人附生曾充縣立兩等小學校長及勸學員等職爲人平正端方謙恭持已辦學十餘年成績卓著去職家居以詩書自娛不問時事性格清高於此可見年近古稀誨人

不倦爲鄉里所欽仰

王兆行 字恕齋山左棗陽人壯年遷於縣屬西南境五百牛象堡遂家焉爲人性耿介心純正學問淵博爲當時名宿平生潔慎自持始終如一家學淵源芝蘭競秀如翼廷翼清等名冠士林皆其猶子也門人如閻蓉第劉樹棠吳學毓王岱峰等皆一時名流相繼輩出詢爲一縣學子之津梁

恒 吉 字瑞峰縣區十二牌人曾充永陵街副督統衙門司達候補驍騎校因某協領侵吞兵餉公慨先首義赴省呈控由此去職蟄居鄉里營商爲業在鄉隱居十餘年鄉人無雀鼠之爭會款無絲毫苛派此皆恒公爲人正直默化之力也至民國初年又充區

鄉董對於地方事宜俱秉公論一鄉之民裨益良多卒年八十有四中庸曰大德必壽信不誣也

曹殿隆 字冶山世居縣街曾充縣一區鄉董區長等職性耿直氣豪爽排難解紛不避勞怨行年七十精神矍鑠對於公益事項見則必爲前經張太守呈請獎給急公好義鄉望夙著區額兩方對此獎詞可稱無愧

劉 恩 字惠亭縣二區東昌台人曾考取吏員嗣於民國年間創辦巡警自治事宜被選爲總辦暨區長各職爲人辦事精敏頗有毅力遇鄉里有爭訟者盡力排解今雖人往風微而稱頌猶不絕於口

依 惠 字子元附生由筆帖式改充熊岳防守尉性情純厚睦族敦鄰凡戚友中婚嫁喪葬之無力者咸周濟之故友高某厝柩夏園荒寺覓其子助資歸葬人皆義之

郭元麟 字仁軒本籍附生質最遲鈍有至性每日手不釋卷父死墓離其居二里每日兩餐必携羹漿拜奠三年如一日

杜炳文 字蔚廷本籍附生修養平和有與相處數載者未見其暴怒之時友于甚篤待其弟炳麟愛護備至終身不懈

王上林 字雲樓本籍人候選知縣銜少負俠氣鄉里有爭必排解之甲午之役逃兵四竄盜賊蠡起閭閻騷然操辦團練保衛地方鄉人德之推爲總辦光緒二十六年俄人北上潰兵東擾靈副都

統調駐永陵山陵賴之以安旋有匪酋劉永和聚數千人稱忠義軍蟠據通化西瞰興京王扼守岡山嶺劉匪不敢西下明年春俄人東來將團練中之利器搜去俄軍方去未及整頓賊卽由北路竄入興京廳署付之一炬當時退去賊首林成岱復由通化竄至江南遂焚王之宅第賄誘王之部下乘間刺之遂遇害原配郭氏殉之

楊德增 字品一秉性豪爽鄉中事無鉅細輒能排解和平曾充城廂議事會議長及保衛團團總等職爲人息事日無暇晷不畏強橫言人之所不敢言皆中於理

恆孚 字致中滿號舉人爲人慎重寡言持躬嚴與人厚一介不苟取主地方公款處數年兩袖清風涓滴歸公人以清流目之

馬恆昌 字子蕃曾充省議會議員爲人亢直尤急於地方公務後充本縣保甲委員協助沈令募款倡修縣志實於文化有力焉

永成阿 字東郊恩貢生爲文簡當善議論見義勇爲光緒初年與覺羅貴德聯名在省請減興京落地稅由此蠲除一切雜捐計至趙督改變稅則歷十年之久商民獲益良多光緒初年建修文廟勸集捐款實與有力

蔡惠春 字子陽本縣旗籍人魁梧偉岸慷慨易直胸無城府而膽畧過人居托伙洛初忠義軍爲亂挾其衆勒賄頗巨以君爲質刀加於頸者再而氣不怯釋君一村賴之保全清末匪據千山他軍

擊之累月不退時君爲哨官駐永陵省憲調往勦一擊而退其後屢充警察保甲等長官其所駐守遠近匪人望風而不敢犯

黃長熙 字敬甫本縣中學畢業生充小學教員爲人諄諄誠厚有弟長升染疾君遠近延訪巫醫不辭勞瘁湯藥必口嘗而後進弟亡厝棺近郊君日必往撫其棺悵悵如靡所之而後返是有至性者於今鮮矣

孫繩昌 字奉璋縣街民藉曾選充省議會議員對於公益有當仁不讓之勢辦學十餘年純盡義務經前縣知事沈公獎給興學育材匾額一方其人事母至孝對弟友愛可風一方

蕭德懋 字子材縣四區平定山人曾充縣商會副會長爲人心術純正作事端方是非利害辨之甚明慷慨直陳不避勞怨可謂寔心任事者矣

李德有 字潤普縣五區葦子峪村人年八十六歲體格建壯學識宏富曾充前清練長學務員等職爲五區士紳熱心公益事業慷慨好義尤樂佈施等慈善事宜誠德品俱尊之鄉耆也於康德元年受敬老會之褒獎

蕭璧書 字循權縣四區平頂山村人年五十二歲品高德重一方景仰

蕭世培 字蔭廷縣四區平頂山村人年六十一歲品高德重一方景仰曾充公吏多年從無隕越其廉能亦可概見

李寶眞 字香古縣四區平頂山村人年五十三歲品高德重一方景仰

李仙嘏 字端本縣四區平頂山村人年七十九歲生平尚信義重道德持躬涉世謹厚溫平閭里稱道異口同音

石貴璿 字顯廷縣一區藍旗村人性情純厚謙恭待人曾充村長多年清廉自持眞有一介不取之概又能濟困扶危憐孤恤寡德孚鄉里以故前縣知事鄒健鵬獎給熱心公益匾額村民恭送公心悅衆區額以旌其閭而表謝忱

陳德鄰 字宣三縣五區那爾畔村人曾充教員十二年區長三年丈勘清賦委員一年後辭職隱居不問世事凡鄉里有事不分鉅

細必爲和平了解鄉人皆稱之

白儒珍 字聘卿滿洲廂白旗人世居縣街河北年六十八歲爲人賦性樸訥存心忠厚讀書夙有根抵爲文簡潔老當中年試而未售遂立志潛修不求聞達舌耕爲業訓子成名至今蘭玉盈階光增閭里詢可爲士林之坊表

高爾安 字輝臣縣街河北人壯年曾充警察巡官辦事清廉對於地方均持和平主義及至大同元年選充縣農會長舍己從公不避勞怨迨時局平定卽行辭職以讓賢路孝行出於天性耿直本於自然雖處困難地步毫無苟且行爲

李學通 字誠之縣街河南河人醫術世傳存心濟世不墜家聲爲

人態度和藹耿介爲懷且精於堪輿之學凡有求者不憚其煩以是鄉人咸稱頌焉

崔文煥 字彩亭縣街河南人曾充縣署戶科副經書爲人存心慈善急公好義凡鄉鄰有難必荀匍救之行年七十精神矍鑠可爲一鄉碩望

劉書麟 字向宸縣街河北人營商有道書法天成凡有求書者無不立應其爲人之慷慨已可概見

劉書府 字向廷縣街河北人爲人心平氣和與人無爭其治家有法教子有方與之鄰者總未聞其家有詬諱之聲父慈子孝兄友弟恭門庭和藹可爲一鄉之坊表

萬邦憲 字耀庭縣街河北人業商爲人事親則孝教子有方親朋有緩急者無不盡力賙恤貧而無諂富而不吝惟斯人足以當之

楊德純 字善一縣街河北人業商爲人性鯁直言中理處家庭則兄友弟恭待鄉里則取借不吝謹慎自持無瑕可指

孫鴻圖 字耀宗縣街河南人法政學校畢業曾充縣農會副會長爲人學業充實品行純粹辦理會務言必中理一鄉之人莫不欽佩

劉廣仁 字樂山縣六區百花島人歷充縣農會會長爲人勤慎公正對於會務實力盡職不辭勞瘁鄉党有爭必以和平解決是以膺職十數年曾無隕越頗孚衆望

燕祚祿 字煥亭縣街河北人現充市農會長存心正直誠樸耐勞
辦事務持平允人民稱頌焉

龐壽彭 字作三縣街河南人讀書夙有研究設帳多年訓誨殷勤
後充縣農會評議員持論公允尤諳於典禮春秋上丁致祭必居
通贊之位而唱禮焉進退有度發必中節禮成而無愆諸生皆稱
曰知禮

王振東 字蓋忱縣六區南彰党村人係天津高工畢業曾充師中
教員暨職業女師中各校校長並縣農會長等職爲人性情和藹
作事諳練對於親友有事力爲接濟急公好義鄉望素孚在縣充
公多年事蹟昭著人皆稱焉

宋桂馨 字香山縣六區人曾充小學教員及縣立女子師中國文
教員爲人端重沉默寡言頗孚一鄉之望

黃金來 字依山縣街萬隆店經理聯任商會會長有年商民欽仰
爲人存心慈善濟弱扶傾遇有公益事項務必成人之美所以久
於其任夙孚衆望自事變以迄平靖艱苦備嘗卒能履險如夷轉
危爲安非有過人之毅力何克臻此

富翔陞 字鳳閣縣三區永陵街人歷充商會會長現任水利合作
社社長爲人長於經濟富有經驗對於公益事項極力經營將來
實業發展惟富君是賴焉

關榮和 字貴亭滿洲正紅旗人世居大夏園村曾充該旗領催爲

人豪爽見義勇爲民國十八年充日新中學校學董對於學款處
置得宜惜經事變後學校停辦未能完其志願

吳玉書 字祥麟縣街河北人歷充警察官長等職現任縣街市保
長爲人精明強幹謹慎廉潔奉公守法寬厚待人雖任職多年而
躁釋矜平頗爲鄉里所推重

姜翰周 字渭濱縣街河南人奉天法政學校畢業爲人廉潔自持
不求聞達肥遯自甘其氣節清高迥異流俗

葆良 字際元滿洲廂藍旗人附生世居三區嘉禾村曾充老城
八旗小學校長工書法善屬文惜中年捐館未得展其所學一生
儉以持己燥釋矜平

圖聯芳 字郁文縣三區永陵鎮人北平朝陽大學畢業爲人謙遜
和藹學問深純自事變後維持師中學校由河北移於河南另行
建設校址校具所有延聘教員及招生等事煞費苦心師中學校
得以至今存在者圖君之力居多

馬清溪 字靜宣縣街人河南曾充縣一區保長及縣立教養工廠
長等職爲人處事和平凡鄰里有難者必委曲救之遇有公益事
宜力爲襄辦毫不辭勞

宋桂 字香亭曾充縣八區保甲總辦性情慷慨遇事認真對於
鄉評頗給衆心雖物故多年至今猶稱道不衰

關榮武 縣八區木奇村人歷充興京警察巡官及直隸兵站總務

處會計主任等職爲人和平辦事純正頗孚一鄉之望

王鳳恩 縣八區木奇村人曾充保長及五縣聯防勦匪大隊長人甚純厚爲公忘私在本縣服務多年頗孚衆望

趙作霖 縣六區龍圖村人文學極佳十年以還教讀四方知名邑內近則結茅山麓徜徉自樂不與世通大同二年元旦曾憶其賀年聯云日國滿國協和國二國江山一統車同倫同書文同大同天子萬年可謂得機得勢矣

金玉庭 縣街河北人業商爲人正直無私和平處世雖年近古稀而精神矍鑠曾談已往之因果言之歷歷不爽

楊春發 字日暄縣街河北人業商爲人心存公道確是讓中求利不取義外之財於事變時各民戶在該號所存粮石全行損失及事定後均照數賠償雖本號受若大影響亦所不顧其經商有道已可概見

竇志畚 字滋彘縣街河北人現充協和會會長爲人度量豁達書法清秀辦理會務勤慎耐勞遇有因事相爭者必善爲勸解以和平解決人皆稱之

廖德馨 字香亭縣街河北人幼讀詩書試而未售壯而設帳施教有年啓迪後進循循善誘一生勤謹自持和以待人毫無崖岸

楊君如 字尙一業商縣街河北人心純正性和平中年境遇坎坷從事農圃有君子固窮之風晚年好道頗有心得故其態度融融

可親可敬

于濟川 字汝舟縣街河南人舌耕爲業工書法善屬文設帳於縣之東街年逾古稀誨人不倦啓廸後學循循善誘所謂發憤忘憂不知老之將至也守分安命順時聽天爲人若此庶乎近焉

海子嶠 縣街河北人壯年業醫晚年好道爲人正直和藹不露鋒鋌年逾古稀健壯非常其存心養性由此可見

林符 字際周縣六區彰党村人爲人品德高尚見事勇爲不凌貧民其在村中勸善規過排難辦紛均不遺餘力誠可爲一鄉之模範也

王銑 字金聲縣八區木奇村人道高德重學問淵深名望素著現充區農會文牘員

劉永蘭 字香圃縣四區杉木廠村人年七十歲健康如昔德著鄉里

楊吉玉 字荆山縣四區杉木廠村人年六十九歲健康如昔德著鄉里

郭明仁 字子君縣三區榆樹村人爲人不辭辛勞捨己成人年老

體弱仍在各地講道德說義仁堪爲一鄉之模範

崔廣雲 字鵬飛縣三區永陵街人賦性慷慨熱心公益歷充三區區長兩等學校學董等職曾蒙前奉天省長獎給匾額一方題曰熱心教育前者興京縣橋嶺失脩交通險阻且沿途僧道及狡詐奸民等僅用一簣之士墊脩嶺道或用一枝之木架一渡橋卽向往來車戶索要無數金錢甚至五步一橋十步一嶺逼錢攔路毆傷損命者比比皆是崔君有見及此遂不避勞怨將橋嶺應歸官辦詳細理由分條陳述稟請縣長戴裕忱核准經繼任鄒子方知事援案執行由民國二年開始辦理每年收入國幣三萬餘元除去橋梁工本之外尙贏餘國幣二萬餘元陵街兩等學校純係用

款倡辦卽今縣立第三第四兩學校是也迨民國五年興京縣學款統一始將橋款歸縣辦理全縣學校本縣學務之發達教育之振興崔君之力實多卽今縣款收入此橋亦居大宗

王永財 字 縣四區大北沟村人年七十四歲於光緒三十年被舉爲鄉長辦理村務民國五年始行退卸然雖退任不遺餘力排難解紛勞怨不計並經屢次捐資修補廟宇德望素著鄉里宗仰

呼永芳 字 縣七區占貝村人爲人公正信義言行一致

吳萬邦 字子和縣六區鄭家村人素行豪爽不拘小節兄弟十餘人友于甚篤里人有訟爭者必爲排難息訟處理村務二十餘年

里無爭訟之聲絲毫不染一介不苟於地方公益爭爲之先猶爲人所難能焉

蘇維新 字秀峰縣六區鄭家村人年逾耳順行不用杖性質豪邁遇人無所可否年老嗜書復嗜吟詠壯年設帳十餘載啟迪有方循循善誘桃李成蹊省縣迭獎賞與三五莫逆登高作賦並語及當年充總長巡官剿匪事宜所言雖非金科玉律亦足資借鑒模型多矣

丁澄明 字際清縣六區鄭家村人生於仕宦之家而不矜不躁不凌平民行事以義待人以禮排難解紛不遺餘力一舉一動洵足取法村內士紳固不乏人而能爲鄉里之模型者殊寥寥惟丁

君足以當之

遲相林 字海川縣八區水手村人爲人公正秉性豪爽鄉中有一事無論大小排難和平凡遇公益慷慨襄助鄉人德之

滿禮本 字裕忱縣三區永陵街人漢族也畢業於本縣簡易師範歷充各鄉小學教員及縣二縣十各校高級正副教員私立小學校長鄉教育會長縣教育會常務委員現任縣立第四小學校校長歷經有省視學嘉獎記功其人和平處事廉潔持身尤足錄者伊父早年去世既乏兄弟又無姊妹孤兒寡母慘狀堪憐好在祖父母在世家道小康祖母高氏愛護備至伯父子方教之養之不遺餘力迨由師範畢業後擔任教職每年所得薪金省食節衣盈

餘不過番佛二百盡數交家而伯父以爲貧不讀書富不教讀倘若家私毫無僅賴教學不足養贍則舉家老幼均凍餓矣責曰教讀者乃讀書人之末路且汝年已三十恨未成立莫妙各自爲生然而世俗習慣家私不論多寡必須按房均分方能解散如果分多潤少則己身不足養贍欲不分令姪淨身出戶又恐不義進退維艱終日不去於懷念茲在茲而禮本查知底蘊繕白願書請求脫離家庭家私分文不取此後富貴貧賤各由天命當蒙慨允發一庭訓准許脫離關係斯意也一則善養伯父之心以省日久憂慮成疾一則廉潔持身以免依賴父母餘蔭此後生活獨立漸有餘資伊母青年守孀艱苦備嘗不忍湮沒無聞因請旌表建立碑銘以揚後世其爲人之孝廉殊堪欽佩

王慶昇 字級三縣七區占貝村人前曾任七區區長公正昭著言行相符堪爲鄉黨之模型

王上林 字雲樓縣二區江南村人於光緒三十四年督率團丁忠義軍戰死經知府孫公奏請 皇上恩賜官爵封其子王銘箴世襲一等恩騎尉孫在鎬世襲仁騎尉並給王郭氏牌坊一架以示旌表而慰幽潛民國年間王岱珊捐資興學經鄒前任獎勵熱心教育匾額一方

黃廷振 字 縣七區佟莊村人父母逝世妻死子亡形單影隻一人立戶生活維艱然於民國三年時有一木匠劉陸陽六十五

歲缺嗣無後孤身無倚且重病纏身乞討度生時常露宿黃廷振心發慈念仍將劉睦陽接到家中供養認爲義父病給診愈體因健壯奉之以禮視爲父親迄已二十年矣無一言一事加逆無一時一刻失歡似此視人老如已老以行孟子所謂老吾老以及人之老之箴言誠近世孔教淪沒孝道失宣時期之模範也

傅光雲 字祥三縣二區旺清村人曾充奉天警務處視察員及二區區長區保長等職通化警務督察員並道德高宏品行端方素孚衆望可爲鄉里之模型

孟繼文 字 縣四區青沟子村人

戴奎 字 縣四區青沟子村人

以上二人均甚樸直可爲一鄉之模型

杜傳明 字子新縣六區同安沟村人壯稍習書歷充警察兵士嗣升巡長職作事認真堪稱倦勤返鄉繼會事達八年之久頗感鄉民仰望共送匾額一方詞曰閭里荷光以頌揚其德後以村制改革選村長竟因票多落選僅付以村董名義

孫憲文 字述周八區木奇村人歷充學董學務委員等職創設區立模範兩等小學校煞費苦心誠樸耐勞作事認真蒙獎熱心公益匾額一方以彰碩望

李俊芝 二區巨河村人爲人忠正尙和平崇博愛村民每有爭端或訴訟者必極力爲之排解村中每有疑難必力爲之開導有膽

量好助人爲善熱心教育幫辦學務決非武斷鄉曲者可比可謂
一鄉之模型矣

鄉老

先王既有尊年之禮鄉党豈無尚齒之文讀洪範一書九五福曰壽
誦南華一卷八千歲爲春香山古稱九老竹林昔號七賢顧盼自豪
馬伏波精神矍鑠賓筵抑戒衛武公德業勤修講鄉射之儀情聯桑
梓飲治聾之酒社宴雞豚上壽中壽下壽閭里光榮曰耆曰艾曰耄
熙朝人瑞彙編於左以誌高年

鄉老

李慧清 二區樺樹咀子清靜堂領正現已年髦猶康強如壯年白髮童顏人皆以鐵胳膊李呼之

郭玉春 三區榆樹村人曾充前清副都統衙門司達年七十五歲猶健壯如常

吳廷奎 四區大北溝村人現年八十二歲生於前清咸豐二十一年精神矍鑠堪稱健翁

王永治
林文公係六區前安河子村人均年逾花甲精神矍鑠每日走路尚行七八十里

卜景山 字哈蘭亭係二區東昌台人現年七十九歲曾充旗署領催一生作事不偏不私素有鄉老之目

何春林 七區占貝村人年逾古稀正直無私

陳太和 七區佟莊村人一生係堪輿家現年八十五歲精神異常莊敖氏 七區佟莊村人莊廣仁之母年八十四歲耳不聾眼不花健壯非常惟精神稍次耳

梁廷信 八區鴿子洞住戶係梁爲山之父年八十五歲耳目如童精神體格與壯年人無稍差異

劉陸陽 六區佟莊村人年八十六歲目光神足身體健壯惟耳聾矣

宋德貴 六區佟莊村人年九十一歲耳目雖聾花尙稱健壯

柳長青 五區橙廠村下青沟子住戶年七十四歲

王延齡 五區橙廠村下青沟子住戶年八十歲

王殿鰲 四區平定山村住戶年八十六歲

何春林 四區平定山村住戶年八十六歲

劉振寬 六區後安河子村民年已逾髦精神矍鑠目光甚健尙能業農可稱爲一健翁也

蘇文 六區鄭家村人年逾花甲而精神矍鑠每飯兼人之食可行七十餘里所謂老當益壯耳

王鈞 二區巨河村英盈河南人年已八旬有七平生爲人忠誠耿直善經濟好施與處世接物取不虧人主義身體健壯目光灼

灼猶能自理家政勤操作誠本村之模範老人也

孝友

孝庸德也而至庸實寓至奇焉夫孝天之經地之義民之行也自古言大孝者必以舜爲稱首舜處倫常之變而卒克諧以孝爲尤難也處舜之境遇猶能以孝聞則凡天下之父兄不若瞽瞍與象者其子弟無不可勉而爲孝友也後世之孝子固不能與舜比然孝順德也人能得親順親斯之謂孝菽水承歡萊衣戲綵何一非孝之事哉

孝子

張萬芝父被匪焚斃萬芝痛甚尾匪行踪不離左右經三四年之久匪脫身綠林匿居安東日本租借地萬芝破千金設法執之解歸興京匪百計狡猾延不成讞適張督辦巡境匍匐行泣陳父仇匪始正法乃歸葬其父

任玉崑耕鑿事母怡色柔聲無絲毫違逆親心之處遇母不愉則婉轉奉承必得歡顏而後止每遠歸必以鮮物供進

吳學坤業農家貧樵蘇奉親力謀甘旨

杜玉林生有至性日俄戰時兵役竄擾閭里玉林捨妻子財貨負母避山谷間誤入俄兵中以身蔽母恐爲流彈所傷卒無恙

張聖元字甲三本籍候補巡檢秉性孝誠母老每苦於濁垢聖元手
自泔澀奉進甘旨尤能曲承親心

白儒珍讀書有行事親尤謹母亡以哀毀之故三年不宿內室以代
廬墓之誠

夏福山縣二區巨河村人少孤母勤儉織布以度生活及長讀書頗
知奮勉初中畢業經商桓城生活日見裕如但事母至孝每日寢
食器具必親自侍奉暇則談講故事以娛親心嘗語人曰歐陽修
有言祭而豐不如養之薄也我未及事我父雖日祀之安得盡孝
哉但使父母一生快活雖死無憾矣如此則可爲人子之模範矣
史忠誠縣六區鄭家村人從來居山僻之間鮮知孝道惟史忠誠篤
於親母病於床數月不起其不解衣不就眠者亦卽數月始終
如一毫無懈容其平日愉色婉容悅親心者尤多多矣

白雪樵縣六區龍圖村人幼年失怙而素行純薦於母病之時醫藥
無效致誠禱於神割股肉如掌合藥以進母飲之少愈今疤痕宛
然白每撫之垂淚云

支德山縣五區南山村支家堡子人年四十一歲其父已故去三載
事母至孝和顏悅親無絲毫違逆親心遇母不愉婉轉奉承必使
歡顏而後已遇母有疾恆終日不食每日憂戚疾愈方有喜色出
必告返不面每遠歸必以鮮物奉母又以和平處鄉里人皆欽佩
之

于寶林縣六區佟庄村六道河子住戶父建善母劉氏幼時家道小康設塾從教深領孔孟之教義幼學壯行奉親以孝順爲重晨昏定省出入必告物雖至微亦必獻食事雖至屑亦必稟告從無一言一事加逆遐邇稱道父七十四歲逝世寶林年二十二歲母七十二歲離俗時年三十八歲皆各披麻三載素餐三月墳旁陪孝七宵似此孝親事之以禮葬之以禮乃近世孔教衰頹時所罕見誠孝子也

吳學坤縣六區鄭家村人家貧如洗箠瓢屢空事親甚孝顏色怡如卒底送雙親於泉下可云孝矣亦云難矣

吳桂森縣八區木奇村人於前清光緒戊戌年在 永陵關防衙門

考取二兩拜唐阿父母在堂時菽水承歡夙夜弗懈父患病三年煎湯熬藥必親自檢點並無逆言可謂孝矣

郭文凱縣三區榆樹村人現年四十九歲父母生前能事之以盡其力死後復葬之以禮可稱孝子

郭常霖縣三區榆樹村人事母甚孝不但盡力奉養卽怒不可遏時惟母命是聽

郭喜霖縣三區榆樹村人曾爲海龍藍旗驍騎校事母頗孝

顧仁品縣五區草盆村東暖泉屯顧良忱之子年三十四歲未嘗受教生來賦性孝順自幼至今雖家道寒微對於雙親衣食未稍凍餒親有所愛委曲購置親有所憂軟語解之每日工作雖疲倦萬

分至晚間親不睡伊亦不眠而尤和容悅色爲常人所難能孔子曰色難伊誠有達到者矣方近知者莫不贊嘆

李文林字秀山縣六區同安沟村人行年十歲失恃繼母馮氏性器狡虐待之從無怨色侍奉愈謹後馮氏生一女而文林待之如一母所出卒化母爲慈現文林五十三歲其繼母已七十有二歲矣未賞有一忤逆辭色也查李某爲警界老手歷充巡長及分所長職人極和善處事認真在警界三十餘年人情練達向無誹議之者今雖家居奉母曾語人曰事親之道不外順其心而已聞其言考其行頗有道德無怪人呼之爲孝子洵不誣也

郭遇春縣三區榆樹村人事母甚孝母病告天祈減己之壽以益母

年出於至誠

關恩三縣一區黃旗沟住戶事親甚孝每出必告每歸必面如遇父母疾衣不解帶親賞湯藥人皆以關孝子呼之

劉連仲縣一區蘇伙洛村劉家堡人年六十一歲賦性鯁直事親最孝八歲由生身父升福處過繼與恩福爲子十八歲當家侍奉祖母母親極盡愉色婉容之禮雖暴加叱責必跪而承受更與親生母賈氏雖承祧旁支更能盡孝甘旨必先奉嘗年節必接到家中拜跪以承歡焉承祧絕支墳塋二十餘座祭祀必誠必敬鄉黨親朋咸無間言更對於兄弟間尤能顧恤子姪等調資讀書婚嫁資助不吝不矜尤爲常人所不及

節烈

柏舟自矢衛風致詠夫共姜松節堪嘉禮器比德於君子董氏封髮二十年之苦志可欽陳婦隕崖片刻間之決心何壯不二其德從一而終節勵冰霜志堅金石洵可風也至若衛姑拒賊盧婦則飲刃猶甘教子成名孟母之斷機足法生同室死同穴彤管揚芬旌其閭表其廬赤繩夙訂驚龙感悅巾幗中不乏名賢荆釵布裙蓬戶間亦多懿範備實錄以彰淑德發潛闡幽登簡冊而勒貞珉流芳誌美於以端風化正人心其庶幾乎

節烈

徐氏 興京鑲黃旗莫輝洛之妻 康熙年間旌表

李氏 興京正白旗永烏諾之妻

王氏 興京麻勒之妻

富氏 興京陸什之妻 以上三氏俱雍正年間旌表

永陵總管所屬

關氏 鑲黃旗薩穆哈之妻

耿氏 正黃旗三泰之妻

覺羅氏 正白旗蘇爾泰之妻

達氏 正白旗朱光彩之妻

傅氏 正白旗劉琪之妻

趙氏 鑲白旗科什之妻

何氏 鑲白旗索奈之妻

曹氏 正紅旗哲庫納之妻

馬氏 鑲紅旗海哈之妻

伊氏 正藍旗額岳納之妻

關氏 正藍旗松奇之妻

關氏 鑲藍旗衆神保之妻

徐氏 鑲藍旗阿爾泰之妻

旌表

以上俱雍正年間先後

李氏 興京正黃旗六十四之妻

乾隆三年旌表

孫氏 興京鑲白旗秦泰之妻

乾隆七年旌表

經佳氏 鑲黃旗閑散永明之妻

馬佳氏 正黃旗閑散德錫諾之妻

佟佳氏 鑲藍旗松起之妻 以上乾隆十一年旌表

商氏 興京正藍旗閑散尼瑪善之妻 乾隆十三年旌表

關氏 興京正紅旗開達哩之妻

錢氏 興京正紅旗德保之妻 以上乾隆十四年旌表

永陵總管屬下

索吉氏 正白旗閑散英壽之妻

張氏 興京鑲藍旗和善之妻 以上乾隆十五年旌表

卜氏 興京正藍旗拜翰之妻

佟氏 興京正藍旗拜喜之妻 以上乾隆十七年旌表

魁氏 興京鑲黃旗七十之妻 乾隆三十年旌表

華氏 興京正紅旗閑散王順澤之妻 乾隆三十三年旌表

王氏 興京鑲黃旗常雲之妻

郎氏 興京鑲黃旗達藍太之妻 以上乾隆三十七年旌表

褚氏 興京正白旗格巴庫之妻

蔡氏 正紅旗馬桑阿之妻

李氏 興京鑲藍旗多隆武之妻 以上乾隆四十年旌表

塔塔拉氏 興京正藍旗烏爾太之妻

伊爾根覺羅氏 興京正白旗姚住之妻

張氏 興京正紅旗陶齊之妻 以上乾隆四十二年旌表

張佳氏 正黃旗閑散四格之妻

碩佳氏 正白旗閑散舍英之妻

楊氏 鑲白旗閑散興仁之妻

伊爾根覺羅氏 正紅旗五十二之妻

納喇氏 正紅旗四十九之妻

伊爾根覺羅氏 正紅旗阿勒圖之妻 以上乾隆四十五年旌表

宋氏 興京正藍旗閑散三格之妻 乾隆四十六年旌表

王氏 興京正黃旗閑散岱木之妻 乾隆四十八年旌表
瓜爾佳氏 興京正白旗常海之妻 乾隆四十九年旌表

穆氏關銘鐸之妻青年夫亡號泣雪中負疚而死

劉秦氏夫亡七日不食而死入節婦祠

文氏關惠蔭之妻年二十歲于歸明年夫亡孑然一身茹苦勵操現年八十歲黨閭賢之表其居曰柏貞萱壽

王氏讀書明理十八歲適劉氏二十三歲夫故遺二子長四歲幼子在襁褓中氏以針黹助二子讀書後充女學教員教子尤勤年五十四歲病故

滿李氏義方之妻于歸二年夫亡氏年二十一歲以翁姑俱老遺腹未占男女遂含泣以生是年生子教之成立年三十六歲病故
季方氏縣街富紳季永昌長媳也二十六歲夫朝死夕殉之

張汪氏年二十二歲適士人張芝蘭爲繼室芝蘭固績學敦品亦知書習禮克相其夫事姑稱孝撫遺嬰如己出光緒二十七年忠義僞軍擾境張室儲蓄一空劫後餘生諸形困難氏猶夷以自攝黽勉勗夫以期恢復惟芝蘭當警變憤鬱之後宿疾復發於冬月二十日長逝氏以隻身摒擋一切面無戚容人多異言次晨召其二子耀凱耀東諄諄訓以善事祖母撫養幼妹之道若永訣者家人固意其宿心自裁而他人尤嘖有煩言未幾毒發身死發引之日雙棺並舉里巷觀者爲之動容

王楊氏士人銘箴之妻十八歲來歸伉儷甚篤甫二年銘箴病故氏矢志冰霰繼子承祧年五十七歲而終

蘇石氏成祿室也十九歲于歸夫家赤貧安之若素尤善積蓄以致家道小康而成祿故遺孤八歲蘇氏族單丁稀無與資謀氏葬夫撫孤身任其艱二十年如一日遣子遊學不惜重資使子卒以詩書克其家現已諸孫繞膝年躋六旬精神矍鑠

方氏高恩麟之妻于歸三年生一女又三年恩麟染疾氏侍湯藥四年恩麟故氏無戚容葬夫之翌日吞藥自盡

李氏高同麟之筵室同麟病咯血溢逝越二日氏服藥以殉任氏孫功慶之妻夫亡甚早堅持冰節茹苦三十餘年撫子成立家道小康年六旬有奇

閻藍氏昌會妻于歸三年夫往關外省親渡海船沉死於水氏時年

二十五歲生子學程甫數月終以孝事翁姑撫孤子爲志子長家貧無力讀書氏晝操井白夜事紡績令子讀書卒使詩禮克繼清光緒二十六年因山東歲饑攜子移居興邑至民國九年享壽六十七歲而終

依伊氏二十歲夫亡矢志三十年子已成立道光時建坊旌表

孟佟氏景和之妻于歸三年夫染疴氏侍湯藥衣不解帶者數年氏年二十九歲夫亡遺腹生子三歲而天氏守節二十餘年民國八年內務部獎給白綬銀章并匾額以旌其閭

湯氏孫廷瑚之妻十九歲于歸二十九歲夫亡家道中落翁老子幼氏力任艱巨四十餘年卒致家道中興子孫成立年七十五歲內

務部獎給節勵松筠匾額并銀質褒章以旌其居

郭氏士人龐壽彭之叔祖母青年矢志白首全貞光緒十七年紳氏王寶濤據情呈請由省提奏十八年奉諭例贈六品封典賜建坊銀准在本地建坊旌表

富李氏 縣三區永陵鎮人清時出任甘肅知州李春琳之女永陵正紅旗防尉富慶增之妻也幼而淑慎長而柔嘉年二十一于歸夫倡婦隨名聞鄉里詎料蒼天難測將五閱月而慶增亡當是時也家道清貧衣食維艱既無伯叔又乏兄弟僅有慶增先妻遺下八歲弱女一名該氏典質簪環辦理喪事又得永陵副都統發給孀婦銀四十兩遂得送夫骸於奉天省城南蘇家屯歸葬自是以

還日夜爲人縫紉以謀生活輒教訓幼女望其淑慧女年十九爲之擇配此時該氏孤苦伶仃無以自存遂歸寧居住以冀全節而胞弟故去上有老母下遺啞子兼以家徒四壁困難萬狀該氏井白躬操女紅親勞並能應權達變治家有方未數載而家道小康爲老母殯葬與啞姪完婚親友同稱鄉里共欽現年七十五歲猶能勤苦耐勞得暇輒集鄉里婦女講習閨訓言行有足法者觀其孝慈兼著貞操獨標爲永陵所僅有

富氏之女 縣一區茶棚村鄉人傳說該村路北有石碑一座係清中業有富氏之女年十九歲未字舉止端雅謹守閨訓頗稱賢淑乃有無知之徒欲與之私可敬者烈女堅拒不允則以利刃割頸

而絕閭里嘉其潔守貞操女流闡範遂上頌女德爰立烈女碑以旌其貞事距今遠字跡細微風雨摧殘模糊不辨僅鏤有萬古流芳四大字尙可徵焉

張劉氏 縣六區金斗峪村人節烈可嘉於康德元年三月一日曾受國家之表揚盛典

魏蔣氏 縣一區藍旗村人魏俊興之母年二十一于歸夫家清貧操之若素無復顏色相見二十八歲夫故遺孤年方七齡撫子葬夫茹苦含辛卒無他意供子讀書其子復充戶部衙門書吏爲母請表建碑現碑立於該村沟口題曰萬古流芳以旌其母之貞然非貞節之母焉有詩書之子耶

王秦氏 縣六區同安沟村人現年六十四歲其夫王四海以農爲業因染疫纏綿牀褥醫藥罔效竟逝世矣氏方二十三歲家徒四壁心堅鉄石旣無嗣子又乏宗枝而能茹苦含辛歷久不變奇節昭然求之近世未嘗有也雖彰表旌閭惜無人憫其困窮致使節婦衰年苦作衣食艱難良可慨也

林孟氏 縣六區後安河子村人係林德銘之母守孀可嘉有碑一座其文雕刻極爲精細歷久不磨迄今已立五十餘年字跡尙甚清楚

程王氏 縣五區草盆村顧家屯民婦現年五十四歲在二十五歲時其夫病故家境寒苦蕭然四壁當時有子呱呱年僅半歲多人勸其改嫁終不移志誓死守節迨子十餘歲時率子自耕自食以度飢寒今子已成人頗知孝順

邢顧氏 縣五區草盆村人年六十三歲於二十四歲時其夫因賭被害身死有子二人耕炊自苦決心守節耐子成人現在兒孫滿堂衣食不虞若氏者實巾幗中之模範也

李王氏 縣八區木奇村人李儒忱之母四十七歲該氏于三十二歲其夫李鴻達長逝其子儒忱七歲時乃父亡故現在氏子年二十三歲中間十五年該氏上事翁姑下訓幼子辛苦勞績人所欽佩景仰若李母者可謂節烈松筠矣

趙富氏 縣三區二道河村人富霄阿之長女於二十五歲于歸趙

門三十二歲守節

何趙氏 縣三區二道河村人於二十二歲于歸至二十八歲守節於光緒年間領得建坊銀兩

郭王氏 縣三區二道河村人郭常祥之妻同治時常祥陣亡三十三年歲守節八十五歲壽終

張蕭氏 縣四區橙廠村上青沟子居民張瑞齡之妻該氏年十九年歲時于歸夫家三十九歲夫亡現年已六十八歲松筠之操可為後世坤範

王張氏 縣四區橙廠村下青沟子居民張繼鵬之次女適王希作為妻三十二歲孀居家境貧苦三子均幼紡織餬口現在其子均

已成立年五十八歲其心苦矣其操貞矣可不旌表乎哉

姜王氏 縣四區大北沟村人王喜悅之女十七歲適青沟子姜興元為室二十四歲守節坤德昭著行年已六十二矣

呂孫氏 縣五區南三村四方台住戶呂維漢之妻孫氏現年四十四歲二十歲于歸二十五歲夫亡遺一子僅四歲教之成立有柏舟之操里黨皆賢之

呂維成之妻 縣五區南三村四方台住戶現年三十八歲十七歲于歸二十二歲夫亡彼時遺腹未占夫亡後五十八日生一子艱苦度日教子成立冰清玉潔事翁至孝

李劉氏 縣五區葦子峪街住戶李長有之母也劉氏年八十一歲

於十九歲出嫁二十六歲夫病亡守孀所生一男三女男婚女嫁均賴一人主辦現有孫二名曾孫二名家道小康該婦年逾八旬身體健壯品格端正和陸鄉里治家有術教子有方平生崇信佛教終身齋戒松柏節操殊堪褒獎

張王氏 縣二區巨河村英盈住戶張王氏于歸翌年夫卽逝世又一年舉一男名曰夢生惟未載何人妻爲憾氏自撫養以長以教迄今已子孫滿堂矣氏自夫亡而父母相繼去世孤身一人零丁孤苦勤操作視四十年如一日今已年逾花甲猶助子孫治家可謂節烈之婦人矣

趙王氏 縣五區那爾畔村人該氏于歸二載夫亡於江省遺子一時方一歲尙在襁褓中僅有翁父餘無所依氏家貧以針黹助子讀書現年四十歲

吳金氏 縣六區鄭家村人現年七十三歲金玉積之女吳學林之妻也年二十八歲時夫故遺腹子萬寶該婦上事翁姑下撫孤兒松筠自操矢志柏舟家貧不灰其心艱窘不墜其志卒至安翁姑於窀穸撫孤兒以成立子孫綿綿家業殷實克全終始孝節聲宣以弱質婦姝能操此重任者可謂巾幗丈夫矣曾蒙前清

宣統皇帝陛下御旨頒發銀兩自行建坊藉資旌表其建坊旌表原文如下

粵自柏舟矢志詩詠貞媛荻管爰書史稱賢母有一於此已足千秋

節婦吳金氏以一身兼之允宜褒荷 恩綸輝揚彤史者也節婦
爲漢軍正黃旗金玉積之女內務府正白旗吳尙平之子學林之
妻也年二十八學林故遺腹生子萬寶節婦精權大義誓老立貞
更以仁孝矢其誠不以艱難餒其氣茹苦含辛承翁姑之歡愉訓
誨劬勞撫孤子以成立始終克全節孝閭黨久著賢聲宣統元年
五月蒙大臣東三省將軍錫咨送禮部彙題開據冊送節婦吳金
氏係盛京內務府正白旗已故學林之妻實係寒苦守節照例應
請准其旌表俟命下之日由臣部行文該將軍發給銀兩聽本家
自行建坊並於節孝祠門外大坊上題名等因宣統二年十二月
初三日具奏奉旨依議欽此節婦現年五十三歲青年矢志白首

完貞子萬寶現已二十五歲秉承母訓克成厥家婦貞母德風化
攸關爰勒貞珉以垂不朽

李萬氏 縣八區木奇水手村人李春芳之妻年三十一歲夫染疴
故遺二子一女長子廣增九歲次子廣祥二歲女四歲家道赤貧
堅持冰節氏孑然一身無與資謀遣子入學針黹攻讀葬夫撫子
身任其艱現已家道小康諸孫繞膝年躋七旬精神矍鑠

韓史氏 縣八區木奇村玉春室也于歸二十九歲夫患腫疾溘然
逝世遺二子一女長子振聲十一歲次子振鐸五歲女二歲家道
寒徵簞瓢屢空旣無翁姑復鮮兄弟氏矢志冰孀勵苦茹艱二十
餘年漸臻小康閭里嘉其孤寡全貞人皆賢之現年八十六歲尙

能操勞五世同居子孫瓜瓞

吳任氏 縣八區木奇村人吳金富之室也于歸二十八歲夫病溘逝遺二子長子海春五歲次子海泉三歲家道清貧安之若素上事翁姑下撫幼子頗稱孝賢氏青年矢志堅守冰操始終如一日現年六十三歲尚不憚勞

關吳氏 縣一區陡嶺村李家沟台住戶關恩英之妻吳氏十七歲于歸二十九歲夫亡撫孤守節光緒年間曾咨部請領旌表銀兩卒於光緒三十一年五十一歲係廂白旗人

朱劉氏 縣一區陡嶺村李家沟住戶朱慶亮之妻劉氏廂藍旗人年二十五歲夫亡守節嗣子永林劉氏現年七十四歲

羅鄧氏 縣一區陡嶺住戶羅達春係興京廂黃旗滿族因順治間二世祖勒必得爲驍騎校曾請賜封誥貤封一代由是世爲羅氏及其曾祖母鄧太君年二十一歸其曾祖孝事其高祖父母敬順其曾祖三十二歲其曾祖去世家貧其曾祖母撫孤守節善解翁憂嗣後喪葬盡禮教子成立祖父依陞阿公生資英異年二十餘得三兩領催充洋槍步隊扎蘭不幸三十餘卽棄世祖母徐先歿遺其父恩奎公時方七八歲也其曾祖母始而撫孤者今轉爲撫孤碌矣及其母氏何棄世時其子始六歲又承其曾祖母以衰老多之軀茹苦忍痛撫其曾孫春潤比撫其父尤甚者三年而逝世焉享年八旬有七嗚呼守節一生撫孤三世恨無才德不能顯揚

惟有略誌梗概以示木鐸云爾

葉馮氏 縣六區佟莊村住戶葉馮氏年二十九歲丈夫夭亡翁姑逝世幼子二名長子長青年十四歲次子年六歲家無恆產惟有草正房三間僅足棲宿上無三親之依下無叔姪之靠伶仃孤苦形影相弔率長子長春躬畊田畝以營母子三人之生活且紡綿織布營稍許餘資課次子鴻達以教讀冰霜潔守不染一塵常以洋炮槍一顆腰別子一顆附於身旁以防不肖茹苦含辛艱窮萬狀歷三十餘年累得家成業就長子常青居家務農洞明事理執掌家業次子鴻達從教十餘年由前遼寧省高等警官學校畢業歷充警官聲名大振且皆婚娶適時子女成行似此孀守節烈理家有道教管有方殊堪嘉許曾經 聖旨褒揚賜以銀盾於康德元年九月十五日興京縣長張耀東假全縣村長指導員大會開隆重之授與式

張宋氏 縣六區佟莊村大廠子住戶張維本之母張宋氏年二十一歲丈夫夭亡姑早逝世翁年五十有七歲體雖較壯操作維艱幼子二週呱呱懷中家無恆產且極凋零上無二親之依下無叔姪之靠伶仃孤苦三世三人翁老子幼惟伊隻身周轉勤勞耕織事老撫幼節操異常不染一塵奉翁重於孝順慈子教以義方茹苦含辛困窮萬狀翁年八十一歲逝世葬之以禮子年七歲即擇侯姑賢女配定夫婦十七歲婚娶現在子四女一均伶俐非常似

此幼年孀婦不棄老翁幼子繼承祖脉履盡孝慈不避艱窮茹苦含辛潔守冰霜誠近世所未有殊堪嘉許曾經 聖旨獎給銀盾於康德元年九月十五日興京縣長張耀東假全縣村長指導員會議開隆重之授與式

王劉氏 縣六區彰黨村人王克明之母年十七于歸越之載夫永芳病故遺襁褓子僅三齡彼時上有孀姑家無恆產終歲勞動僅資溫飽一般人勸其再醮伊矢志柏舟始終不渝撫育幼子八歲入校讀書取名克明及十六改業農勤儉治家堪稱小康現氏有孫四孫媳三曾孫三兒孫繞膝足供晚年之樂壽七十九歲詎天不假年於康德元年舊曆九月二十七日因病辭世計守節將近六十年鄰里咸稱其賢

張金氏 縣街張仙舫之妻也年十七歲于歸夫家彼時夫年五十歲至二十三歲時夫染沉疴百醫不效復經巫人祈禱云夫壽已到不能久立人世遂在佛前焚化表文懇將氏之壽數移增夫壽十年夫病果愈自此之後夫婦以兄弟相稱同修佛事又十年氏三十三歲夫果因病壽終氏遂潔守冰霜同繼子慶祿經理遺產度日民國十七年間以家資興工在縣邑河北西街建修孀守菴廟宇一所出家爲尼殿宇輝煌正殿係三教佛像西殿係彌勒佛像東殿係供氏夫靈牌在菴東首又與夫立石碑一座以誌衷誠康德元年三月間赴奉天省城慈恩寺戒場受戒拜本如和尙

爲師得戒師青山老和尚係寶華山律儀宗派遂賜名覺真又收
昌祥昌德門徒二人徒孫龍海一人

李王氏 縣七區占貝村莊稼溝住戶李廣山之妻現年五十歲於
二十四歲其夫病故孀居二十餘年操守清白貞節素著生無子
女過繼族姪爲子現年十五歲

林趙氏 縣六區南章党村人年十九歲于歸於林慶爲妻慶生來
體弱酷讀多病娶後病劇婦視爲沈疴竭誠服侍遂居外室不復
入內寢然事舅姑惟謹不以夫病而稍虧婦職慶在彌留之際婦
每夜焚香禱天求以身代逾年夫故節婦毀容祛飾堅決從死慟
極而絕絕而復甦者數次家人咸勸止之並責以大義遂不復言

死節婦三十七歲舅先逝世婦則飲淚咽哀憂劇成疾此後日月
居祖侍隨姑右紅顏白髮相依爲命炎涼情趣獨領略之後姑年
七十有七奄忽而逝節婦年已五十痛苦累日忘寢廢食肢體爲
摧自歎孑然身世有如銜悲孤鶩遂以夫兄之季子爲子遵遺訓
以承宗祧該婦于歸僅及一載而夫卒守志已越三十年而孝親
勵節三十如一日洵堪起巾幗之頹風焉

謝宋氏 縣六區傲什牛彖村人撫順縣宋萬有之女也年二十歸
謝慶林爲室舅姑均在世然皆春秋高邁家業蕭條力田自給慶
林因家貧輟學習醫遂隨父耕作數口之家聊蘇凍餒婦于歸以
來夫婦和順食貧而甘事舅姑盡孝居無何舅先告歿踰二年姑

又下世慶林夫婦孤苦靡依家益零落僅恃醫術維生節婦年三十未舉子已有妊慶林年二十七染病忽遭不起節婦哭踊慟絕絕而復甦惟念腹已有妊倘生男爲君撫之以延謝氏之門如其女也誓死從君迨慶林死後三月忽舉一男命名耀宗孤兒寡母支門度日不堪其苦不得已移住四家子依父母而居荏苒十年宋氏父母亦先後物故節婦又失所憑藉遂又遷居傲什牛彘堡村耀宗亦教養成人賃田數畝率子墾耕節婦現年已六十五歲家庭顛沛淪落一生而撫孤勵節百變而不渝其操詢可謂閨闈之傑出者矣

以上林趙氏謝宋氏節婦二人均於

康德二年十一月七日旌表

文學

孔門四科文居其末子以四教文居其首甚矣文之不可少也古人文以載道無本不立無文不行惟是言之無文行而不遠司馬之文章與功業並傳韓柳之文章以著述名世固不得以詞章之學鄙之也興京僻處邊陲文化較晚開國以前之文字純用滿字後二百年來始設學校專以經藝帖括取士迨至民國廢科學興學校注重科學講求文藝者遂日不暇給矣滿洲建國以來昌明聖道經學與科學並重茲將邑內文學彙爲一編以見斯文之未墜也

文學

王樹滋 字曉坪通籍後結茅阿爾丹山中以吟詠自適著有蔬香館詩鈔梓行於世

王寶濤 字仙舫膺鄉薦後以遊覽自適無志進取六旬後應舉貢會考供職春明才華蕩佚名噪一時寓都作二十四節詩爭相傳誦

王鳳陽 字旭升本籍恩貢文重氣節境內文人多出其門
李如松 字秀冬本籍歲貢工詩文尤精律賦舊日塾中多有抄讀其課藝者

李屬春 字山亭恩貢生十七歲游泮名噪鄉里中年無所遇遜志

時敏課徒四方爲文有度非所不知道

李連第 字仲三久困場屋好吟詠不修邊幅課徒之餘於詩文遂作遂棄不自什惜故少存者

王銘箴 邑東江南村人少年多才長於吟詠惜其不壽二十三歲遽登鬼錄存有朝陽宮題壁數首音節蒼涼不可多得

蘇民 字承天縣一區五付甲人畢業於瀋陽高等師範工文辭尤善於詩憂傷天逝賈傅年華人多惜之前縣志卽蘇子之遺著於茲可見一斑

于鳳桐 字漪操別名孤桐本籍名士也曾肄業於文學專門惜未卒業辭善古文最工遊記其柳柳州之儔歟詩亦清新殆得唐人

三昧者曾續修輝南縣志卽本縣前志亦多出其手焉

徐文波 字水心老城人國立高等師範畢業工古文著有國文淺說語中旨縈啓廸後進不少

王受瑄 字東玉縣二區旺清門人附生後徙居西豐爲人聰穎明達工文詞詩賦以其夙承庭訓有箕裘弓冶之風惜年華方富遽染中風證以致平生抱負未得發展

吳學毓 字文山縣街河北人優廩生日本宏文書院畢業歷充各縣視學及本縣勸學所長教員等職爲文詞氣浩瀚議論宏博見解尤非淺學所及至獎勵後進輔導諸生具徵熱心教育一時莘莘學子被其薰陶者實繁有徒

王廷勳 字麟閣縣六區安河村人曾充永陵高等小學校校長及縣立女子中學教員等職於古文頗有心得在科舉時代屢試未售後充教員講解詳明著作清爽爲視學所嘉獎領有檢定文憑

劉愷元 字虞臣縣街河北人附生學有根柢不干榮祿著作清新流利爲當時儒林所推重

王翼清 字槐午縣六區五百牛彖堡人歲貢生性豁達故其爲文流動生姿有一瀉千里之勢對於詩賦尤爲擅長本邑後起之秀多出其門

桑錫琳 字琛璞縣一區蘇伙洛人附生歷充縣中學教員老城高小學校校長等職工古文善議論學者多蒙指導裨益良多

蘇彥文 字煥章縣街河北人爲文筆致清漪不落凡蹊在科舉時代薦志上進屢試未售自開辦學校以來久膺中小教員訓誨諸生諄諄不倦畢業者十餘級惜時運乖舛潦倒終身捐館後家境蕭條殊堪惋惜

呂鎬顯 字京離山左卽墨人歲貢生山東省立優級師範畢業在興京從事教育殆將十稔現充女子師中學校教員學問淵博文筆雄健潛心經史得力獨深尤熟於考據之學本縣續志編輯之稿半出其著作

張振國 字濟韜縣街河北人奉天省立師範史地專修畢業現充縣立師中校訓育主任才華磊落學識優長雖係科學根柢而對

於詩文尤爲嗜好凡所著之文字雖不清新流麗悅人心目足徵
素有研究故能談吐自如

趙春森 字奉璋縣三區紅石碕村人曾充日新中學國文教員才
華英發文筆條暢且潛心經傳著有經學註釋淺說三卷尙未付
梓僅將周易總序登入藝文志中

仕隱

德 裕 字仲克京兆人任永陵副都統拓別野於呼蘭哈達深處
樹木藝麻籬落鷄犬自成一家蕭然山水之間以適其性非致祭
陵寢時不著衣冠云

逸民

孟天祿 處士亞聖之裔不喜世故懷其學行徜徉西南山水之間
今六區金斗峪山麓松林蒼靄中石碕題曰處士孟天祿之墓考
其時係清康熙年人

流寓

廉景星 字辰階承德縣附生文氣清奇在興京設帳多年如李屬

春萬選青通化之馮景山桓仁之馬貞謙皆出其門下放浪形骸
崇尚介節輕貲財不以貧爲病光緒初年在城廩途間爲賊所獲
數百人中抗言直論其爲盜之非賊俱心服見其囊空如洗贈三
十金堅却不受強置囊中擁之行至岐途賊去先生以柳條縮金
懸於樹間而去

龍芸芝 字香閣昌黎縣人畫水墨蟬蛸白菜有專工兼工書法設
塾新賓堡多年

閻昌壽 字靜山山東卽墨縣廩生在興京境內設改良私塾多年
畫水墨葡萄生動有致兼能八分書

翁璽珍 字銘三籍隸山左潦倒遼東而家於蓋平主講興京中學
以老其身爲文謹嚴有法諄諄以獎掖後進爲懷故邑人之受其
教者咸得先生衣鉢之傳焉

龔燦章 字星槎山左萊陽人在縣邑設帳二十餘年爲人豪放不
事生計文如行雲流水詩亦清新俊逸如劉樹棠王翼清王翼廷
吳學毓等皆出其門下故本縣士子蒙其陶冶者甚多

仲肇麟 字玉書海城人在永陵街縣立女子小學校充教職十數
年啓發後學頗護進益經省視學嘉獎得有實力盡職文憑後去
職學者思之

劉瑞雲 字宣忱山左臨朐縣人流寓興京舌耕爲業在永陵鎮日
新中學充文國主講熟於經史諸書著作宏富門人趙春森深得

衣鉢之傳惜於事變後去職致失士林之望

孫毓勛 字佐員縣八區木奇村人歷充高小及中學國文教員講解清晰雖勞不倦爲文熨貼切當尤熟於考據之學有活字典之稱訓詁詳明從遊之士頗獲進益

氏族

世家大族標姓氏於千秋偉烈豐功留芳名於百世黃帝子孫神明胄系烏衣宰相王謝家風閥閱增光溯龍興之舊地邊疆開拓啓夷夏之雜居泯畛域之見天下一家考譜系之繁旗民異派總之分茅胙土知世代之源流食德服疇守先民之矩矱車服不改無數典忘祖之愆部落分明有飲水思源之義爰志氏族以備稽核

氏族

漢族興京原係女真舊地無土著民戶有清龍興以後開邊殖民於是山東直隸之民漸漸來居二百年生息蕃衍漢族實居多數世譜亦難備考姓氏繁多不能枚舉茲將聖賢後裔及其異於漢族者之姓氏臚列如下

孔氏至聖裔居罕羊區

孟氏亞聖裔居葦子峪

仲氏

顏氏

旗族統稱曰滿洲曰蒙古曰漢軍分言之滿洲旗中又有佛滿洲義

齊滿洲包衣滿洲三項

佛滿洲卽陳滿洲長白山人清初從龍入關後撥還興京

肇氏卽愛新覺羅氏

佟氏卽佟佳氏

關氏

馬氏

索氏卽今曹氏

南氏卽今那氏

傅氏卽今富氏

齊氏

卽氏

以上八姓謂之從龍八戶

伊氏卽今蘇氏亦從龍舊裔

義齊滿洲原居烏拉康熙十七年遷眷屬萬餘口改著盛京隨各牛
彙管理後撥各省附入八旗充差隸興京者無多義齊清語作新字
義齊滿洲卽新滿洲

包衣滿洲清末入關以前凡各部落被俘者皆爲包衣滿語譯爲僮
僕隸上三旗者歸內務府隸下五旗者歸各王府爲世僕居興京者
甚少皆係內務府充差

按以上兩項滿洲人其姓氏多與漢族相同當共和後尤難考查
蒙古族蒙古部落最多天命天聰崇德年間歸清世隸軍籍順治初

從龍入關及康熙年間與滿洲人撥還盛京後復同撥興京編入八
旗曰陳蒙古巴爾虎蒙古曰新蒙古係悉喀爾卡入全部萬餘人遊
牧張家口外康熙三十一年撥一千二百餘人歸盛京每一百人編
一佐領分駐遼開熊復金鳳岫七邑未及興京境內因無巴爾虎旗
人

瓜爾佳氏

劉氏

朱氏

張氏

白氏

王氏

石氏

按以上數姓就蒙古族中大戶刊載近皆名上冠姓與漢族無別又錫伯旗人卽西夔族原居伯都訥康熙年分撥來興編入八旗披甲充差自旗署檔冊燬於俄燹氏族卽不可考

漢軍原籍內地人居多或於清得遼瀋時先入旗籍或因入關後開墾邊田報名領地殆來入籍亦有民人因賞加入總稱曰漢軍其姓氏與漢族同

壯丁此項旗人雖曰漢軍檔冊仍別之曰壯丁聞係平定耿藩時得力之馬夫編入旌佐

台丁站人台丁司塹邊掘塚有老千統轄之站人司傳遞公文官至驛丞而止

按以上兩項人撥來世族及數目以旗檔燬後無可考稽回紇族西域人居興年月未久戶數亦少

張氏

哈氏

馬氏

王氏

李氏

特別姓氏

雋建音氏

朴漂音氏

按此二姓傳聞係清初征服朝鮮入旗籍者包衣滿洲中有箕子後裔與此說相類

愛新覺羅氏 清國姓在境內之腰站地方者隸滿洲右翼鑲藍旗人乃興祖直皇帝第三子索長阿之裔族屬頗旺散處各地名宦亦復不少該姓原分二宗一曰宗室二曰覺羅在境以覺羅為最多宗室亦有之現多以金肇氏為肇為肇祖之封號

富察氏 大金國志謂之蒲察氏本金氏部族名音轉為富察八旗滿洲氏族通譜謂本係地方名因以為氏現姓富氏亦有以傅為氏者如乾隆中葉之大學士傅恒則然散處於縣境大夏園下夾河多木伙洛永陵街各地原係蜚悠城地方人總管古桑阿之裔族屬頗旺他如旺清門老城之富

察氏旗佐各異

錫塔拉氏 清國戚顯祖宣皇后之母族也散處於大夏園永陵街各地現多以圖爲氏

扈錫哈里氏 原住瓜爾察地方天命十年其祖尼卡達投清尼卡達之子岳家順仕至領隊官現多住於縣境之下夾河各處以關爲姓乃其祖關東之名

瓜爾佳氏 現多簡姓關氏大夏園照雅溝皆有之

蘇穆祿氏 現多姓徐氏羊祭台等處皆有之

佟佳氏 簡姓佟氏永陵各處皆有之

那拉氏 一作那喇現多姓白氏那氏姚氏南氏散處於永陵大夏

園地方

依爾根覺羅氏 現多簡姓趙氏散處於永陵上夾河各地

寧古塔氏 本係地名因以爲氏今姓劉氏散處於陡嶺永陵各地

索佳氏 卽今賣馬集之曹氏也

薩卡達氏 卽今永陵木奇等處之李氏恩貢生永成阿卽其氏也

敖斯氏 又曰鄂斯氏蓋滿文之同字異音者今永陵之敖氏卽該氏之簡姓

沙彌氏 卽今永陵之柴氏

鈕姑祿氏 清太祖文皇帝讀金史見金世宗禁襲漢姓曾諭滿人
不准以漢氏爲姓卽以該氏爲鑒有所謂蓋弊之則爲狼

也以該氏誤姓郎氏也

吳舒氏 攷吳蘇氏之在縣境者現有五姓以其遠祖兄弟五人各以名爲氏故有吳穆包邵黃之五氏散處於穆家屯大夏園永陵街各地方

以上皆爲滿洲氏族

烏機漠科奇氏 卽今占貝各處之楊氏

涉扈勒氏 卽今鮑家歲子之馬氏

土默特氏 卽今占貝之倪氏

以上爲蒙古氏族

附同居紀瑞

田 廣 南鄉人二百餘年同居世紀已歷五代百三十餘口一體和睦民國四年鄒縣令巡境親造其居義之表厥間曰友于可風

高有財 同居四世計二百餘年家人八十餘口風紀泐穆烏犬同槽亦南鄉人

方外

周和尚乾隆時棲於西下夾河後山石洞每春初洞左右匝種玉黍蜀以歲之日計其株數一穗不熟則其日不食里人禱雨空山曾見其與虎狼戲搏雲爲球跳擲其間亦或托鉢近村得粟易香還燒於洞人或與之言輒飛奔而去一夕火燭遠近聞山中有管絃聲後卽不見

智興廣甯和尚光緒初來游居三教寺通醫數年間濟人甚夥後以不堪其擾而去

清和尚卓錫於城西雙龍寺身修八尺長眉闊目額角突似達摩年八十餘矍鑠異常人不知其名氏咸以老清呼之

慈善

天地有好生之德聖人存胞與之懷本一念之慈祥作種種之善舉孟子曰有不忍人之心斯有不忍人之政以不忍人之心行不忍人之政治天下可運之掌上夫慈善所賑者廣總之不離仁愛者近是如捨衣糧賑貧民拯疾苦施醫藥等莫非實惠及人之事是在量力而作出以至誠善推其所爲而已矣志慈善

慈善

趙璧 素日遇有族人及外人衣食不足者則捨衣食以救濟之故有大堡村通溝村富家堡子村民衆送立匾額曰一鄉善士

李品三 於民國十五年在村東大河修大板橋一道約長五丈餘又在村北小河修板橋一道約長二丈餘至現在九年逐年橋資共有百餘圓皆出已囊堪稱善舉

塔青阿 滿清宗室下園村二伙洛人也好善樂施見義勇爲常見蘇子河中游下園處爲西南路往來渡口每逢春夏水長或值天氣寒冷涉渡維艱甚至斷絕交通遂即於清嘉慶八年三月慨造善船一面善橋一座以利行人而便交通至今稱便考其

子孫相繼奉行已歷依惠恒孚松齡三世矣毫無倦色

王漢章 江西舉人在江東龍頭山上建修關帝廟一處又捨渡人舟二隻以便交通而濟居民

車車
理宗
行堂

饅首排子廟街住戶於民國十六年各皆捨地二畝建築學舍興辦教育自此以後則該鄉男女兒童均被教化民智大啓誠義舉也

喬賡雲 字漢章曾任安東採木公司理事長於民國十六年捐助現大洋兩萬圓爲日新中學教育基金

穆青山 平定山村商戶遼陽人也零丁一人性仁慈業商所獲餘資概恤孤寡書曰樹德務滋其君之謂歟曾於民國十八年間

在平頂山村東西南臨津處鳩工備料起造木橋三道於是行人稱便有口皆碑迄今已五稔矣且歷年春秋河伯肆虐圯毀折損繼起修補者屢焉而穆子莞然無怨語夫銖積寸累之血汗金錢咸洒此三橋上矣嗟乎穆子之力雖竭於斯而其永矢弗諼之志固不可拔以視乎坐高堂殫民財以自爲得意者更何如耶蓋禍因惡積福緣善慶而穆子行年已逾耳順且復健壯異常詩云受天之祐知古哲不吾欺也穆子精醫術自鍊膏丹僉散與苦困孤獨輩其行臧德敦可銘金石可照日月凡爲君子可不崇拜之哉

郭秀峰 二道河子學校開辦時無欸慨然捐資五百元以作本校

基金

關恩三 字慧卿係本縣二部師範畢業曾充各小學校校長教員天性純厚對於善舉尤奮不顧身我村黃旗溝校之成立關翁爲創辦人曾捐現大洋三百元名耀當時有口皆碑而黃旗溝之三百赤子得受王道教育亦實關翁有以使之然耳

孫繩昌 字奉璋於康德元年因鄉民缺食捐助慈善會紅糧五石以濟災黎

慈善會

於大同元年兵荒災異民不得生血性同人不忍坐視遂糾合組織慈善會以救難胞公推許文卿任正會長以張鳳林副之同人各盡所能秋末許張辭職復推閻和興爲正會長以洪慶三副之自成立以來施粥施藥施痘施衣施棺掩埋周濟旅困更設庇寒所以免凍餒當時各員去就不一大同二年改編職員迄今未移均係義務良心作用茲將歷任組織沿革暨現任各職員姓名列表於左

興京縣慈善會之組織沿革一覽表

機關名	職別	員數	額備
興京縣慈善會	名譽會長	五	
	正會長	一	
	副會長	一	
	董事長	一	
	理事長	一	
	董事	二	
	理事	二	

考

興京縣慈善會歷任會長姓名一覽表

總務部長	慈業部長	文書股長	會計兼庶務股長	交際股長	救濟股長	勸募股長	宣道股長	慈善關係事項經手人常務
一	一	一	一	一	一	一	一	一

姓名	名次	籍貫	資格	卸到任差年
許文卿	觀堂	山東	醫	大同元年十一月十五日
張鳳林	阿峯	河北省南皮縣	警官	大同元年十一月十五日
閻和興	振華	河北省南宮	商	大同元年十一月一日
洪慶三	錫恩	京	商	大同元年十一月一日

興京縣慈善會現任各職員姓名一覽表

職別	姓名	次章	籍貫	資格	任職年月
名譽會長	魁益臣		營口	前興京縣警務局長	大同二年十二月
全	劉如先		興京	興京縣公署內務局長	全
全	王振東	晉忱	全	興京縣立女子師中校長	全
全	吳學毓	文山	全	前興京縣勸學所長現孔教會長	全
全	黃金來	依山	直隸	興京縣商務會長	全
正會長	閻和興	振華	河北省南宮縣	商	全
副會長	洪慶三	錫恩	撫順縣	商	全

董事長	劉廣仁	樂山	興京	前電話局長現縣農會會長	全
理事長	張學海	汝舟	興京	興京縣公署會計股長	全
董事	那承銘	新三	全	興京縣公署文牘股長	全
全	于貴	占元	全	商	全
理事	佟品一	進真	關裏	全	全
全	葛占元	名遠	興京	全	康德元年六月
總務部長	佟品一	進真	關裏	全	全
慈業部長	賈殿元	占鰲	山東	醫	康德元年七月
文書股長	徐花悟	蝶魂	遼陽	前興京二部師範畢業歷充教職	大同二年一月

會計兼庶務 股長	高廷棟	振華	興	京	商	大同元年十月
交際股長	吳桂芸	舜卿	全		<small>第八區農會長 縣立第五小學董</small>	康德元年七月
救濟股長	李禹光	禹光	興	京	西	醫 大同二年三月
勸募股長	張維良	慕韓	全		士	大同元年三月
宣道股長	佟振聲	玉宣	全		士	大同二年十二月
<small>慈善關係事項 經手人常務</small>	徐花悟	蝶魂	遼	陽		大同元年一月
					<small>前興京一部師範 畢業歷充教職</small>	

義舉

世風澆漓人必不古遇有建設公共事業往往漠然置之求所謂成人之美濟人之急深明義舉者實不多觀間有熱心公益不吝施予者亦咸以好名稱之豈知三代而上惟恐好名三代而下惟恐不好名如施學田以培植人材捨義地以掩埋骸骨造橋梁以普渡行人仗義疏財慷慨輸捐者亦所時有若不歷敘事實逐條登載將何以振好善之同心作後來之模範耶表而出之於以傳久遠而勸來茲

義舉

蕭坡 縣四區平定山人係已故紳耆昔曾捐地三畝興建校舍生前爲人急公好義鄉里推崇引爲矜式

王文鳳 字香閣縣一區茶棚村人爲人慷慨樂善好施鑒於本村小學租賃民房終非久計遂捨地五十餘方丈爲本村建築校舍之用以利校務進行而王公提倡教育熱心公益可爲至誠也已

石貴璿 字顯廷係一區藍旗村人爲人大方樂善好施見義勇爲於民國十九年施捨本村校地一塊計八十五方丈建築校舍以利全村兒童讀書又同年陝西旱災人民無衣乏食死亡相藉苦慘之情耳不忍聞而石公奔走各地募款捐資購米親運災區賑賑不畏遠道跋涉之苦而具惻隱慈善之心捨身救人可謂仁者愛人矣

林德銘 縣六區安河村人民國七年時其母在村之西大河建築善橋一處逐年修補因是交通稱便其母已故而其子嗣葺之毫不稍懈焉故往來此橋者莫不頌揚其善行也

